

C hhiáⁿ Kóaⁿ-kín Kàu-iòk Lán Ka-kī Ê Chú-lú Piàn-chiâⁿ LMJ Ê Chéng-chí

Iâu Chì-liōng

Sî-sè ê piàn-hòa hō lán khòaⁿ chhut, mûi chit ê tui lán ka-kī ê bó-gí ū koan-sim ê lâng, kha-pō lóng ài koh khah kín--leh, lán sī teh kap sî-kan kēng-cheng. Sî-kan í-keng bô iông-ún lán koh tī hia tiû-tû, lán ê āu-tāi í-keng chin chē lâng bē hiáu kóng, mā jú-lái jú-chē ê siàu-liân-ke thiaⁿ bô in ê lāu-pē á-sī in ê a-má sī teh kóng siáⁿ-mih óaⁿ-ko. Chit-ê tāi-chì chin giâm-tiōng, chóng-sī chit-má ê pē-bú lóng hut-liòk chit-ê chêng-hêng, iáu-sī kám-kak thák-chheh khah tiōng-iàu, kóng-ōe

ē-thong chiū ē-sái-tit lah ! Tāi-ke kám m̄-sī lóng án-ne?

Tùi ōaⁿ sin ê chip-chèng-tóng chip-chèng chiah khai-sí chhui-tōng bó-gí ê kàu-hák, lán chò-hóe lâi kiám-sī chhui-hêng bó-gí kàu-iòk ê kiat-kó. Sit-chāi chin khó-sioh, chin-chiâⁿ sī li-li lak-lak, lōan-chhèng-chhèng. Tī chit ê sî-chūn ū chin chē lâng chin jiát-sim iā chin jīn-chin tâu-jip chit-hâng kang-chok. Chóng-sī chin bô-chhái chit-lé-pài chiah 1 chiat khò, i-sù i-sù, sit-chāi iā bô sím-mih thang kî-thâi--ê, nā kóng khah pháiⁿ-thiaⁿ leh ! Sī kan-taⁿ teh

èng-hù èng-hù nā-tiāⁿ. Tī chiah-nih-á kiông-sè ê Pak-kiaⁿ-gí kap Eng-gí ê kēng-cheng hā, bó-gí khah bô chhut-sòaⁿ ê ki-hōe, tāi-pō-hūn sī lóng hō lâng hut-liòk kap hi-seng nā-tiāⁿ.

Tâi-ōan Gôan-chū-bîn ê bó-gí it-tít liû-sit, kàu hiān-kim chha-put-to chhun chit-kóá-á khah ū nî-kí ê tióng-pòe, iáu sió-khóá-á ē-hiáu kóng, chin ū khó-lêng mā chin chē bē kí-tit lah! Chit-ê chêng-hêng sit-chāi chin bô-chhái, in-ūi gí-giân nā sî-bông, nā liû-sit chiū chha-put-to sī éng-óan siau-sit. Lán chiū tī put-ti put-kak tionsg sún-sit chit-hâng bûn-hòa ê pô-pòe. Sio-siāng ê chêng-hêng kî-thaⁿ ê bó-gí, mā-sī chin kín ê sok-tō teh siau-sit. Kheh-ka-ōe iā chiām-chiām teh pó bē tiâu. Kin-á-jit tòa tī chit-tè bí-lē tó-sū ê peh-siⁿ thái ē tú-tiôh chiah-ê bûn-tê? Lán nā beh lâi thàm-thó, tong-jiân gôan-in ū pah-pah-khóan, kám-kak siāng-kài tiōng-iàu--ê, sī chò pē-bú--ê bô chin-chiâⁿ thiâⁿ-sioh ka-kī, bô kiông-liát pô-chûn bó-gí ê i-gôan. Tùi chèng-hú chèng-chhek ê kái-piàn bô chû-ì, bô chin-chiâⁿ koan-sim, bô iau-kiû ka-kī ê kiáⁿ-jî ēng bó-gí tī seng-óah tionsg tui-ōe. Kàu kin-á-jit iáu koh gōng-gōng-á kòe-jit! Nā koh án-ne, m̄-bián koh gôa-kú lán chiū ē khòaⁿ tiôh lán ê āu-tāi bē-hiáu kóng pē-bú-ōe.

Khang-chhùi pō-chih sī lōng-hùi sî-kan nā-tiāⁿ, lán ài kóaⁿ-kín khiā--khí--lâi, iû-kî sī TLH ê hōe-ōan. Lán seng iàu-kiû ka-kī, chiong lán ê jiát-chêng, chiong lán tui LMJ sin-khór ê sim-tit, chiong lán tī LMJ ê châi-hôa kap hèng-chhù, kín lâi thôan-sêng hō lán ka-kī ê chû-lú, kàu-iòk lán ê chhin-chiâⁿ kap hó pêng-iú, hō in ē-tit-thang chai-iáⁿ, lán ê sian-chór só lâu hō lán ê Hō-ló-ōe sī hiah-nih-á súi, pang-chân in chìn-jip bó-gí bûn-hák, koa-iâu, im-ūn, tau-kù chin chhù-bī ê sè-kài. Siāng kài chio lán iā ē-tàng tī chhui-tōng ê kòe-thêng tionsg, khip-ín koh khah chē lâng hō in iā ē sán-seng hèng-chhù lâi hák-sip, lâi gián-kiù, lâi chham-ú, chò-hóe lâi chhui-tōng. Kin-á-jit lán nā bô kóaⁿ-kín chò chiah-ê khang-khòe, lâi pô-liû chit-kóá-á bó-gí ê chéng-chí, nā khòaⁿ khah giâm-tiōng leh, Tâi-ōan-ōe mā

ē chhin-chhiūⁿ Gôan-chū-bîn ê bó-gí sio-siāng, siau-sit tī lán ê bâk-chiu chêng. Chin-kín lán chiū-ē thiaⁿ-tiōh Tân-ôan-lâng kóng ê ūe chin chē sī put-tâp put-chhit ê Tân-ôan-ōe.